


Inilalathala ng Partido Komunista ng Pilipinas-Bagong Hukbong Bayan sa Rehiyong Bikol

REBOLUSYONARYONG  
PANGMASANG  
PAHAYAGAN  
NG BIKOL

Taon XXV Blg.3  
Hulyo-Setyembre 2002



**EDITORIAL**

**SONA ni GMA:**

## **Isang Ilusyon ng Kaunlaran sa Ilalim ng Globalisasyon**

**B**inato ng mga batikos ang State of the Nation Address (SONA) ni Macapagal-Arroyo. Pawang walang katuturang mga datos ang kanyang ipinangalandakan upang ipakitang may pag-unlad diumano sa ekonomya ng bansa. At kasabay nito, kanyang ipinagmayabang na isang "matatag na republika" ang kanyang papabagsak nang rehimen.

Sa likod ng magagarbong salita at nakakalulang mga datos na kanyang binitawan, hindi maikukubli ang tunay na kalagayan ng 88 porsyentong pamilyang Pilipino na lalo pang nalulugmok sa papatinding paghihikahos.

**Sundan sa pahina 2**

Inilalathala minsan bawat ikatlong buwan ng Partido Komunista ng Pilipinas-Bagong Hukbong Bayan sa Rehiyong Bikol

# Nilalaman

Hulyo-Setyembre 2002

## Editorial

SONA ni GMA:  
Isang Ilusyon ng  
Kaunlaran sa Ilalim ng  
Globalisasyon 1

GMA, Tuta ng US,  
Patalsikin! 4

Kundenahin at Labanan  
ang Pasistang Rehimeng  
Macapagal-Arroyo 7

Sa Ilalim ng  
Rehimeng US-GMA:  
Sinisilya-Elektrika  
ang Bayan 10

Eskandalo ng mga  
Monopolyo-Kapitalistang  
Korporasyon:  
Nilulumpo ang  
Ekonomya ng US 13

Gawaing Masa:  
Kamtin ang Higit Pang  
mga Tagumpay sa  
Pagtatayo ng Baseng  
Masa sa Kabikulan 15

## Diwang Rebolusyonaryo

"Isang Araw sa  
Isang Baryo  
sa Kanayunan..." 17

Ang Buhay at  
Pakikibaka ni Ka Boy:  
"Ang Muog" 19

**SILYABALITA 21**

**Batoy 24**

## EDITORIAL

### Paglago ng GDP at pag-unlad ng agrikultura.

Nagkaroon diumano ng 3.8 porsyentong paglago ng Gross Domestic Product (GDP o halaga ng produkto at serbisyong nalilikha sa lokal na ekonomya) at biglaang umakyat ang tantos ng paglago sa sektor ng agrikultura dahil diumano sa programa nito sa modernisasyon at liberalisasyon.

Ang pag-unlad ng ekonomya ay isang ilusyon. Sa katunayan sustinido ang pagbagsak sa sektor ng manupaktura at industriya. Dumaos ito sa pinakamababang tantos sa loob ng mahigit dalawang taon.

Bagamat tumaas ang tantos ng produksyon sa agrikultura dahil sa mainam na panahon, wala itong naidulot na pag-unlad sa buhay ng mga magsasaka. Nananatiling kontrolado ng mga burgesya-kumprador ang buong sektor ng agrikultura. Ang bahagyang pagtaas ng presyong itinatakda nila sa mga produkto (*farmgate prices*) ay dulot ng pagtaas ng gastusin sa produksyon. Idinidikta nila ang malawakang paggamit ng *high yielding varieties* na nangangailangan ng mas mahal na mga abono at pestisidyo.

Sa katotohanan, hahantong muli sa pagbaba ang mga presyo ng mga produkto, lalupa't ipinangako ni GMA ang todo-todong liberalisasyon sa sektor ng agrikultura. Patuloy pang dadagsa sa lokal na pamilihan ang mga imported na bigas, mais, kamatis, sibuyas, karne at mga produktong *poultry*. Nangangahulugan lamang ito ng tuluyang pagbagsak ng buong sektor ng agrikultura.

### Murang bigas at galunggong

Ipinagmalaki ni Macapagal-Arroyo ang murang bigas sa presyong P14 na mabibili diumano sa 1,500 Glorisa Labandera rolling stores at ang kanyang pamamalengke ng galunggong sa presyong P60 bawat kilo. Dahil dito sinabi niyang napigilan ang mabilis na pagtaas ng presyo ng mga bilihin.

Napakababaw ng ganitong panuntunan para sabihing mas mainam ngayon ang kabuhayan ng karaniwang mamamayan. Para sa kanila, walang kwenta ito dahil lalong bumababa ang halaga ng piso. Halimbawa, noong nakaraang taon, ang P24 ay makakabili na ng 4 na medya ng gaas, samantalang ngayon, 3 medya na lang ang mabibili ng parehong halaga. Lalong nagiging mahirap para sa karaniwang mamamayan na bilhin ang kanyang mga pangangailangan.

### Isang Milyong Trabaho

Palabok lamang ang isang milyong trabaho na kanya diumanong nalikha, tumutukoy lamang ito sa hindi

Sundan sa pahina 3

## EDITORIAL

permanenteng mga trabahong nalilikha ng mamamayan bilang pag-angkop sa grabeng krisis. Samantalang sa unang dalawang buwan ng taon, 355 manggagawa ang nawawalan ng trabaho araw-araw kumpara sa 198 noong nakaraang taon. Resulta ito ng pagtitipid ng mga dayuhang mamumuhunan sa bansa at pagbagsak ng mga lokal na negosyo.

### PPA Ibinaba

Sa desperadong pagtatangkang pigilin ang mga protesta at patahimikin ang nangangalit na mamamayan laban sa PPA, ilang araw bago ang SONA nagkaroon ng pagbabawas na P0.40 bawat kilowatt hour (kwh). At mabilis na naghugas-kamay si GMA, minana lamang daw niya ang PPA. Samantalang noong Abril sa ilalim na mismo ng kanyang rehimen nangyari ang bwelong pagsirit ng PPA sa P3.21 bawat kwh mula sa P1.27 bawat kwh noong Enero 2001.

Mula diumano sa pagiging pangalawa sa pinakamahal na singil sa kuryente sa buong Asya, naging pang-anim na lamang ang Pilipinas.

At balak pa niyang maging "kauna-unahang spot market sa Asya" ang Pilipinas na magpapahintulot sa mga dayuhang kumpanya na pasukin ang sektor ng enerhiya upang magkaroon daw ng kapangyarihang pumili ang mga konsyumer ng kanilang suplayer.

Pinalalabo ni GMA ang tunay na pinagmulan ng problema sa PPA at mataas na singil sa kuryente - ang programa ng

gubyrno sa pribatisasyon. Para mapababa daw ang singil sa kuryente, naglabas pa siya ng 10 puntong programa na sa katunayan ay lalo pang magpapalala sa problema ng sektor ng enerhiya. Ang programang ito ay nakatuon sa buu-buong pribatisasyon at liberalisasyon ng sektor.

### Walang laman na mga pangako sa edukasyon, kalusugan at kabuhayan.


Pangako ni GMA, isang eskwelahan sa bawat baranggay, dagdag na guro at mga libro. Samantalang ang Bagong Kurikulum sa Batayang Edukasyon ay malinaw na isang iskema ng pagtitipid sa papaliit na rekursong napupunta sa edukasyon. Sa ilalim ng iskemang ito babawasan ang bilang ng mga *subjects*, ibig sabihin babawasan din ang

bilang ng mga guro at libro. Sa kalagayang ito, patuloy na dadausdos ang kalidad ng edukasyon sa bansa.

Patuloy namang nagsasara ang mga pampublikong ospital dahil ipinapasa ng Department of Health ang pangangasiwa nito sa lokal na gubyrno na wala namang

kakayahang pondohan at imantini ang mga ospital. Nagkukunwari ding nilalabanan ng gubyrno ang monopolyo ng mga korporasyong transnasyunal sa industriya ng gamot sa bansa habang malawakang itinutulak ang liberalisasyon ng buong ekonomya.

Sa kakarampot na alokasyon sa badyet na kailangang paghatian sa mga serbisyong panlipunan kagaya ng edukasyon (P102.8 bilyon), kalusugan (P13.64 bilyon) at pabahay, pagtitipid ang tanging solusyon ng rehimen. Mas ginagastusan pa nito ang



Sundan sa pahina 4

# GMA, Tuta ng US, Pataalsikin!



Hinding-hindi na maikakaila ni Gloria Macapagal-Arroyo ang kanyang sagad-saring pagkatuta sa imperyalismong US. Bukod sa lubos niyang pagsuporta sa "Digma Laban sa Terorismo" na idineklara ni US President Bush noong Oktubre 2001 at pag-alipusta sa pambansang soberanya sa napipintong pagpirma ng Mutual Logistics Support Agreement (MLSA) sa darating na Nobyembre, lalo pang nagpakapapet si Arroyo sa pagtalima sa mga imperyalistang diktang dala ni US Secretary of State Colin Powell nitong Agosto.

Sinalubong ng protesta ang pagdating ni Gen. Powell sa bansa noong ika-2 ng Agosto. Ngunit nanatiling bingi ang sabwatang US-Macapagal-Arroyo sa mga karaingan ng mamamayan. Sinubukan pang linlangin ni Arroyo ang taumbayan na tungkol daw sa pag-eksport ng tuna ang pag-uusapan nila ng kinatawan ng US.

Sundan sa pahina 5

## EDITORIAL

pagbabayad sa utang panlabas na umaabot sa P210.5 bilyon ang badyet.

### **Bangkarote ang rehimeng Macapagal-Arroyo.**

Sa unang limang buwan ng 2002, umabot na sa P107.5 bilyon ang depisit sa badyet (sobrang nagagastos kaysa sa itinakdang badyet). Dahil dito, sustinido ang paglobo ng dayuhang pangungutang na umabot na sa \$52.4 bilyon noong Mayo. Lalo naman nitong itinatali ang lokal na ekonomya sa mga imperyalistang dikta.

Sa gitna ng desperadong pagpapanggap ng rehimen na mahusay ang ekonomya, hindi nito kayang ipakita kahit man lamang ang ilusyong may pag-unlad. Lalo nang nalalantad ang kabulukan at kapalpakan ng mga iskema ng liberalisasyon at pribatisasyon sa ilalim ng imperyalistang programang "globalisasyon ng malayang pamilihan".

Sa pagkakandarapang sumunod sa dikta ng kanyang imperyalistang amo, lalo lamang ibinabaon ng rehimeng Macapagal-Arroyo ang ekonomya ng bansa sa kumunoy ng krisis na nararanasan ng pandaigdigang monopolyo kapitalistang sistema.

Sa pagsusulong lamang ng tunay na reporma sa lupa at makabayang pambansang industriyalisasyon makakamit ang pagsulong ng ekonomya at ng buong lipunan. At tanging sa pambansa demokratikong rebolusyon na may sosyalistang perspektiba ganap na maipagtagumpay ang layuning ito.

S

### Usapang GMA-Powell: Gera, Hindi Tuna

Sa kanilang pag-uusap, tiniyak ni GMA kay Gen. Powell ang tuluy-tuloy na pagsusulong ng pandaigdigang digma laban sa "terorismo" sa pamamagitan ng ibayong pagpapatibay sa MLSA. Pinapahintulutan ng mga ito ang pagpapahaba ng Balikatan 02-1 at pagpakat ng dagdag na tropang US sa Timog Katagalugan, Bikol at iba pang bahagi ng bansa, sa ilalim ng Balikatan 02-2. Muli ring binubuhay ng papet na rehimen ang mapanupil na Anti-Terrorism Bill.

Kapalit ng mga ito ang \$55 milyong tulong-militar mula sa US, na ang kalahati ay nakalaan na para sa pagpapatindi ng militarisasyon sa kanayunan laban sa rebolusyonaryong kilusan at mamamayan. Napapanahon ang dagdag na pondong ito dahil sa ibinilang na ng US ang Partido Komunista ng Pilipinas, Bagong Hukbong Bayan at Pambansa Demokratikong Prente ng Pilipinas (CPP-NPA-NDF) sa mga tinagurian nitong International Terrorist Organizations (ITO).

At bilang masugid na papet, pormal na nagdeklara si GMA ng todo-gera laban sa CPP-NPA-NDF. Bagamat dati nang naglulunsad ng matitinding operasyong militar sa kanayunan, siguradong ibayo pang lalala ang mga paglabag sa karapatang pantao sa mga susunod na panahon.

Ang paghahanay ng rehimeng US-GMA sa CPP-NPA-NDF na kapantay ng Abu-Sayyaf at iba pang teroristang grupo ay patunay lamang na nagbubulag-bulagan si GMA sa pagkakaiba ng mga bandido sa mga grupong may pampulitikang ideolohiya. Naging mapagpasya ang ganitong pusisyon ni GMA

sa tuluyang pagsasara ng NDF sa usapang pangkapayapaan sa pagitan nito at ng rehimen. Nauna nang sinuspinde ng GRP ang usapan, ngunit ngayon ay pakunwaring naghahabol si GMA para sa pagpapatuloy nito sa gitna ng kanyang deklarasyong todo-gera.

Ayon sa matalas na pagsusuri ni Ka Roger, Tagapagsalita ng PKP, nais ng rehimeng palabasin sa kalaunan na "humingi" ito ng tulong sa US laban sa NPA. Gagamitin itong dahilan upang permanenteng makapanatili ang mga tropang US sa bansa na hahantong sa direktang interbensyon ng US sa kontra-rebolusyonaryong digma.

Sa esensya, malinaw na nais lamang ng US na puksain ang lumalakas na mga kilusang anti-imperyalista tulad ng pambansa-demokratikong rebolusyong inilulunsad ng CPP-NPA-NDF. Gagawin nito ang lahat upang durugin ang mga rebolusyonaryong pwersa kahit hanggang sa direktang pakikidigma ng sarili nitong armadong pwersa laban sa mga rebolusyonaryong pwersa.

### Order ni Powell: Hindi Tuna, Kundi Buong Ekonomya!

Kasabay sa utos na todo-gera, ipinaalala din ni Gen. Powell kay GMA ang buo-buong pagbebenta ng pambansang patrimonya ng Pilipinas sa imperyalistang dayuhan. Pinag-usapan ng mag-amo ang lubusang pagtanggali ng mga batas na humahadlang sa malayang pagpasok ng mga imported na produkto sa bansa.

Kabilang sa mga batas na nais nilang tanggalin yaong nagbibigay-proteksyon sa mga lokal na negosyo, naglilimita ng dayuhang pamumuhunan sa 40% ng

Sundan sa pahina 6

kabuuang kapital sa negosyo, at nagbabawal ng dayuhang pagmamay-ari ng lupa. Unti-unti nang inaalis ang mga ito sa pamamagitan ng mga kasunduan sa ilalim ng World Trade Organization (WTO) tulad ng General Agreement on Tariffs and Trade (GATT), General Agreement on Trade in Services (GATS), at Agreement on Agriculture (AoA).

Ang GATT, na pinirmahan ni Ramos noong 1994, ay sumasaklaw sa halos lahat ng industriya. Panimula nitong binuksan ang ekonomya sa paraan ng tuluy-tuloy na pagpapababa hanggang sa lubusang pagtanggali ng taripa sa mga dayuhang produktong pumapasok sa bansa.

Ang GATS naman ay nagpapahintulot sa pagpasok ng mga dayuhang kumpanya sa sektor ng serbisyo, kabilang na sa industriya ng enerhiya, sa sektor ng kalusugan, edukasyon at sistema ng patubig. Nagdudulot ito ngayon ng malawakang pagbebenta sa dayuhan ng mga pampublikong ospital at paaralan, at pagdagsa ng iba pang dayuhang korporasyong may kinalaman sa serbisyo. Resulta na nito ang pribatisasyon ng MWSS at napipintong pagbebenta ng NAPOCOR.

Ang AoA naman ay naglalaman ng pagpapabilis sa liberalisasyon ng agrikultura. Nagdudulot ito ng patuloy na pagbagsak ng mga presyo ng mga lokal na produktong agrikultural at pagdausdos ng kabuhayan ng mga magsasaka. Unti-unting nilalamon ng mga dayuhang produktong agrikultural ang mga produkto ng magsasakang Pilipino dulot ng pagbawas o

pagtanggali sa mga buwis sa mga import, pag-alis ng suporta ng guberno sa lokal na produksyon at pagbawas ng subsidyo sa pagluwas ng mga lokal na produkto.

Sa bigas na lamang, idinidikta ng AoA na patuloy na pataasin ang tantos ng pag-aangkat nito mula 2% ng lokal na konsumo noong taong 2000 hanggang 4% ng lokal na konsumo sa taong 2004. Ibig sabihin, dadami pa ang imported na bigas kaysa sa 2.17 milyong metriko toneladang inangkat noong 1998 na katumbas ng 40% ng lokal na produksyon nito.

Malinaw na nais madaliin ng US ang papet nitong si GMA na pahintulutan ang walang-habas na paghuthot ng mga likas na yaman ng bansa, pagpiga sa lakas paggawa ng mga Pilipino, at tuluyang pagpapabagsak sa lokal na ekonomya upang makapagkamal ng papalaking supertubo ang mga monopolyo kapitalistang karamihan ay nakabase sa US. Upang magmukhang ligal

ang pagsasamantalang ito, muling itinutulak ng rehimeng US-Arroyo ang pagbabago sa reaksiyong Saligang Batas upang mabilisang maalis ang mga natitirang proteksyon ng lokal na ekonomya.

Sa esensya, ang mga diktang ito ay ibayo pang pagpapatupad ng imperyalistang "globalisasyon" sa anyo ng mga patakaran sa liberalisasyon, pribatisasyon at deregulasyon. Ang balangkas na ito ang tanging nakikitang lunas ng mga imperyalista sa di-maibsang krisis sa sobrang produksyon. Sa ganitong paraan, naipapasa nila ang kapitalistang krisis mula

**Bilang tugon sa patuloy na pagpapahirap ng sagad-saring tutang pangulo at sa amo nitong US, kailangang ipagpatuloy ang rebolusyonaryong paglaban sa kanyang rehimen hanggang sa pagbagsak nito...**

Sundan sa pahina 7

# Kundenahin at Labanan ang Pasistang Rehimeng Macapagal-Arroyo!



**W**alang-humpay na hambalos ang ipinapalaspas ngayon ng rehimeng Macapagal-Arroyo sa mamamayang Pilipino. Tuluy-tuloy ang pagbulusok ng kabuhayan dulot ng mga kontra-mamamayang patakarang pang-ekonomyang lalo lamang nagpapataas ng tantos ng disempleyo sa hanay ng mga manggagawa, nang-aagaw ng lupa sa mga magsasaka, at nagkakait ng mga batayang serbisyo't karapatan sa iba't ibang sektor. Sa walang katulad na antas, isinusubsob sa kahirapan at kaapihan ang mga mamamayan.

Sundan sa pahina 8

## GMA, Tuta ng US

sa mga sentro ng kapitalismo tungo sa mga kolonya at malakolonya. Gayunpaman, napapatunayang pansamantalang lunas lamang ito sa papalalang imperyalistang krisis na walang kahahantungan kundi tuluyang pagbagsak.

### GMA: Walang Kasing-Sahol ang Pagkatuta

Sa pagkukumahog na manatili sa pagkapangulo at matiyak ang pagkapanalo sa eleksyong 2004, nais ni GMA na laging pasayahin ang kanyang among imperyalista. Kahit masagasaan ang mga saligang karapatan ng taumbayan at lalong malugmok sa kahirapan ang nakakaraming masang Pilipino, pagsisikapan ni GMA na tuparin ang mga diktang dala ni Gen. Powell, sa larangan ng militar at ekonomya.

Sa kabilang banda, lalong umaalingasaw ang anti-mamamayang tindig at mahusay na pagkapapet ni GMA sa pagtalima niya sa bawat iutos ng US. Unti-unting namumulat ang sambayanan sa pangangailangang sagkaan ang pagpapatuloy ng kanyang termino lampas sa 2004. Papalawak ang nagkakaisang prenteng nananawagan sa pagpapatalsik kay GMA bago pa man umabot ang eleksyon.

Bilang tugon sa patuloy na pagpapahirap ng sagad-saring tutang pangulo at ng amo nitong US, kailangang ipagpatuloy ang rebolusyonaryong paglaban sa kanyang rehimen hanggang sa pagbagsak nito, upang ibayong makapagpalakas ang sambayanan para sa pagharap sa mga susunod pang papet ng US hanggang sa lubusang magapi ang naghaharing sistema.

S

## Kundenahin at Labanan

### KARAPATAN AT KABUHAYAN ANG SIGAW NG BAYAN.

Itinutulak ng ganitong mga kalagayan ang nagtingit na taumbayan na patuloy na dagsain ang rehimen ni Macapagal-Arroyo at igiit ang kanilang mga karapatan at kumilos para sa tunay na pagbabago. Ang tuluy-tuloy at papalalang krisis ay sinasagot ng papalawak at papaigting na mga protesta. Tumitindi ang mga anyo ng paglaban, mula sa ligal na demokratikong kilusan, hanggang sa pagsapi sa malawak na rebolusyonaryong kilusan at sa Bagong Hukbong Bayan.

Sa mga lansangan, paparami ang mga kilos-protesta para sa trabaho, lupa, at karapatan. Papalaki ang bulto ng mga nagmamartsa laban sa pagtaas ng presyo ng tubig, kuryente, langis at mga bilihin, at laban sa panghihimasok ng mga tropang US, sa militarisasyon, at sa iba't ibang anyo ng pang-aapi at pagsasamantala.

Sa mga kanayunan naman, ibayong lumalalim ang pagkakaugat ng Bagong Hukbong Bayan sa ibayo ring lumalawak na baseng masa. Dumarami ang sumasampa at nagiging mga kadre't mandirigma ng Bagong Hukbong Bayan na panahong naglulunsad ng paparaming mga taktikal na opensiba sa pambansang saklaw, na nakapagpapabahala sa rehimen. Pinangangatog ng mamamayan at ng buong rebolusyonaryong kilusan ang tuhod ni Macapagal-Arroyo.

### TODO-GERA ANG SAGOT NI GLORIA.

Pandarahas ang isasalubong sa sinumang maggiit ng karapatan at

maghangad ng pagbabago. Inilantad na ni Macapagal-Arroyo ang kanyang tahasang pagkapasista nang inatasan niya ang kanyang pulisya na tanggalin na ang patakarang "maximum tolerance" o "pagtitimpi" sa harap ng mga kilos protesta. Bagamat dati nang talamak ang pandarahas sa mga demonstrador at welgista, ang pagtanggap ng "maximum tolerance" ay nangangahulugan ng walang-pag-aatubili at pursigidong pagbuwag sa mga rali at piketlayn, at ubos-kayang pandarahas sa mga demonstrador, katulad ng ginawa sa mga nagmartsa laban sa SONA.

Sa kanayunan naman, ikinakalat ni Macapagal-Arroyo ang mga alagad ng terorismo. Pinag-iibayo ang mga operasyong militar na masugid na naghahasik ng takot

sa masa at kumikitil sa kanilang buhay at kabuhayan.

Tila hayok sa dugo ng mamamayan, itinulak ni Macapagal-Arroyo ang kanyang

berdugong AFP

na pangunahan ang

pagpapaapaw ng bilang ng

CAFGU. Sa Bikol, tinarget na

bumuo sa minimum ng anim na kumpanya na may walumpu't-walong (88) CAFGU bawat kumpanya. Tangka ng rehimen ang lukubin ng lagim ang mamamayan at lunurin ang puwersa ng rebolusyonaryong kilusan. Nagbabadya ang pagbaha pa ng mga kaso ng pamamaslang, pangmamasaker, pandurukot at pagsalbeyds, tortyur, iligal na pang-aaresto, puwersahang pagpapalikas,



Sundan sa pahina 9



## Kundenahin at Labanan

pagkakait ng pagkain at gamot, at iba pang anyo ng mga paglabag sa karapatang pantao na matagal nang buong-kasigasigang ginagawa ng mga pinagsanib na pwersa ng militar at CAFGU.

Upang mapalawig pa ang pasismo ng kanyang rehimen, nagbuhos si Macapagal-Arroyo ng 60.2 bilyong piso para sa Department of National Defense at 5.4 bilyong piso para umano sa modernisasyon ng AFP. Ang mga pondong ito, sa halip na ilaan para sa serbisyong panlipunan, ay gagamitin para tustusan ang kanyang todo-gera. Dagdag pa rito ang malaking bahagi ng 44.54 bilyong pisong badyet ng Department of Interior and Local Government, ang kagawaran ng pasistang g u b y e r n o n g nangangasiwa sa pulisya.

Itinutulak niya rin ang pagsasabatas ng Anti-Terrorism Bill. Ang panukalang batas na ito, na inendorso ni Kongresista Imee Marcos, ay nagsasaad na ang paggiit mula sa estado ng karapatan ng mga sektor, o ang pagpahina ng tiwala ng mamamayan sa estado, sa anumang paraan, ay isang gawaing terorista. Sinusugan naman ito ni Senador Robert Barbers, na parusang kamatayan umano ang nararapat sa mga gawaing terorista. Hubad na sa anumang pagkukunwari ang rehimen ni Macapagal-Arroyo at lubusan na niyang inilantad ang sarili bilang makabagong Hitler. Pasismo ang sagot sa protesta. Todo-gera laban sa masa.

### GLORIA, TUTA!

Abot-tenga ang ngiti ng imperyalistang amo ni Macapagal-Arroyo sa

iniamba nitong pasismo. Sagad-sa-buto ang pagpapakatuta nito nang agaran itong magdeklara ng todo-gera laban sa mamamayan at sa rebolusyonaryong kilusan matapos isama ng numero unong teroristang US ang Partido Komunista ng Pilipinas-Bagong Hukbong Bayan-Pambansa Demokratikong Prente ng Pilipinas (CPP-NPA-NDFP) sa kanyang listahan ng International Terrorist Organizations.

Pangunahing nababahala ang US sa paglakas ng rebolusyonaryong kilusan, dahil

ang CPP-NPA-NDFP ang tanging hadlang sa i m p e r y a l i s t a n g pangangamkam ng US sa bansa. Kaya't sa tabing ng "digma laban sa terorismo", pinuntirya ng US ang rebolusyonaryong kilusan bilang sunod nitong target. Inudyukan na nito ang kanyang mga kapwa imperyalista u p a n g makipagsalimbayan sa pagdedeklara sa CPP-NPA-NDFP bilang isang

internasyunal na teroristang organisasyon. Tangka nitong himukin ang mga kapwa-imperyalista at bigyang-matuwid ang kanyang digmang agresyon.

Nagbuhos din ang teroristang US ng 55 milyong dolyar bilang pondo umano ng rehimeng Macapagal-Arroyo para sa pagsugpo sa rebolusyonaryong kilusan. Pangunahin ding pinakikilos ng US si Heneral Angelo Reyes, Kalihim ng Department of National Defense, upang maniobrahin si Macapagal-Arroyo. Ang berdugong si Reyes, na siyang nagdisenyo ng todo-gera laban sa Bangsamoro sa panahon ni Estrada, ang siya ngayong humahawak sa leeg ni Macapagal-Arroyo upang tumupad sa mga dikta ng US.

**Hubad na sa anumang  
pagkukunwari ang  
rehimen ni Macapagal-  
Arroyo at lubusan na  
niyang inilantad ang  
sarili bilang  
makabagong Hitler.**

Sundan sa pahina 10

# Sa Ilalim ng Rehimeng US-GMA: Sinisilya-Elektrika ang Bayan



**H**anggang ngayon, patuloy pa ring dumaranas ng dagdag na pabigat sa bulsa ang mamamayang Pilipino sa papataas na singil sa kuryente. Nananatiling bingi ang rehimeng US-Macapagal-Arroyo sa kahilingan ng sambayanang ibasura ang Electric Power Industry Reform Act (EPIRA), at mga dagdag na singil sa kuryente (PPA, Currency Exchange Rate Adjustment (CERA), atbp.), at isabansa ang industriya ng kuryente.

Patuloy na pinapahintulutang magkamal ng laksa-laksang tubo ang mga lokal at dayuhang kumpanya sa kuryenteng na kabilang sa mga Independent Power Producers (IPP), makapagbulsa ng kurakot ang mga burukratang kasabwat nila at pagkakitaan ng mga upisyal sa gubyernong kumokontrol sa mga kooperatiba sa kuryente ang mga anomalya dito. Masahol pa, ipinagmalaki ni GMA sa kanyang SONA ang programa ng rehimen sa pagpapababa sa singil sa kuryente, habang patuloy niyang sinisilya-elektrika ang mga Pilipino sa masasamang epekto ng EPIRA at PPA at iba pang dagdag na singil.

Sundan sa pahina 11

## Kundenahin at Labanan

### **TULOY ANG LABAN! PASISTANG GLORIA, PATALSIKIN! TROPANG US, PALAYASIN!**

Walang patutunguhan ang todo-gera ni Macapagal-Arroyo kundi ang sukdulang pagkundena ng mamamayan. Tulad ng pagkamuhi sa panghihimasok-militar ng US, sasalubungin ng galit ng mamamayan ang pasismo ng rehimeng Macapagal-Arroyo.

Hindi maglulubay ang protesta ng mamamayan. Sa halip, ang lumalalang krisis sa ekonomiya ay lalo lamang magtutulak sa mamamayan na lumaban at sumapi sa rebolusyonaryong kilusan. Gayundin naman, itutulak ng krisis ang mga ganid na burukrata-kapitalista at mga heneral na mangurakot sa pondo na nakalaan sa todo-gera.

Kabiguan ang kahihinatnan ng rehimeng Macapagal-Arroyo at ng todo-gera nito. Dudumugin at pababagsakin si Macapagal-Arroyo ng galit ng milyong mamamayan mula sa lahat ng panig, sa iba't ibang paraan, at sa papaigting na antas.

S


### **Binuong IPP Contracts Review Board, Inutil**

Upang pahupain ang kalampag ng protesta ng mamamayan, binuo ng rehimen ang isang grupong magsusuri sa mga kontrata sa pagitan ng NAPOCOR at mga IPP. Layunin daw nitong solusyunan ang mga anomalya sa mga kontratang ito upang maibaba ang singil sa PPA.

Ayon sa pinakahuli nitong ulat, anim lamang sa 35 pinakamahal na kontratang inimbestigahan ang walang anumang ligal o pinansyal na usaping kailangang ayusin. Dalawampu't pitong (27) kontrata naman ang napatunayang "depektibo," kung saan 22 na may iba't ibang antas ng pagka-"depektibo" ang nirerepaso pa, habang ang natitirang lima ay ipinasa sa Department of Justice.

Siyam na kontrata ang hindi pinahintulutang i-renew, ngunit karamihan nito ay sa 2004 o 2005 pa matatapos. Ibig sabihin, dalawa hanggang tatlong taon pang magbabayad ang mga konsumer ng PPA sa mga IPP na may-ari ng mga kontratang ito.

Nirekomenda ng grupo ang National Electrification Authority (NEA) upang mangasiwa sa renegotasyon ng mga natukoy na "depektibong" kontrata. Kung susuriin, hindi makatarungan ang renegotasyon ng mga kontratang itong nagdudulot ng papataas na PPA na binabayad ng mga konsumer para sa kuryenteng hindi naman nila nakokonsumo. Kalakhan pa nito ay bayad sa kuryenteng hindi kailanman nilikha ng mga IPP. Binabale-wala ng renegotasyon ang bilyun-bilyong pisong binayad ng mga konsumer sa NAPOCOR at mga IPP sa loob ng maraming taon.



### **Mga Kooperatiba ng Kuryente sa Bikol, Puno ng Anomalya**

Sa rehiyong Bikol, talamak din ang anomalya sa pagpapatakbo ng mga kooperatiba sa kuryente. Patuloy ang pagtaas ng singil sa kuryente habang dumadausdos naman ang kalidad ng serbisyo ng mga kooperatiba. Napipilitan umano ang mga itong sumingil ng papataas na basic rate, PPA at iba pang dagdag na singil at madalas ang brownout dahil sa pagkalugi at sa di-mabaya-bayarang mga utang sa NAPOCOR.

Nitong Hulyo, ilang oras nawalan ng kuryente sa mga lugar na sineserbisuhan ng CANORECO dahil umano sa P35 milyong utang nito sa NAPOCOR. Mahalagang pansinin na ang P10 milyon nito ay dulot ng hindi pagbayad ng utang ng Prime Chemical Co. at Paracale Mining Co., ngunit ang mas maraming karaniwang konsumer ang naapektuhan.

Ayon sa mga pag-aaral, sobra-sobra ang singil ng ALECO sa kanyang mga myembro-konsumer. Bukod pa sa PPA at CERA, may dagdag pang Employees Wage Increase Adjustment (EWIA) na ipinapakarga sa mga konsumer. Ang EWIA ay pagpapatupad umano ng resolusyon para sa pagtaas ng sweldo ng mga empleyado sa kooperatiba. Kung tutuusin, dapat itong ituring bilang karaniwang gastos ng kooperatiba, ngunit dahil baon sa utang, minarapat na lamang ng ALECO na ipasa ang dagdag-sahod sa mamamayang Albayanong dati nang naghihirap.

Baon na rin sa utang ang CASURECO II. Nalugi ito ng P13 milyon dahil umano sa maling komputasyon ng PPA. Binawasan nito ang siningil na PPA ng P0.42 kada kilowatthour imbes na P0.30 lang sa loob ng 10 buwan, kaya't plano nitong bawiin sa

**Sundan sa pahina 12**

## **Sinisilya-Elektrika ang Bayan**

mga konsumer ang P0.12 kada kilowatthour sa loob ng parehong panahon. Ang totoo ay sumobra ang gastos ng kooperatiba ng may P10 milyon. Bahagi lamang ito ng P20 milyong hindi kasama sa ulat na siguradong napunta sa mga bulsa ng kurakot na mga upisyal sa nasabing kooperatiba.

Walo sa labing-isang mga kooperatiba dito sa rehiyon ang dumaranas ng pagkalugi at mga problema sa pangangasiwa, ayon sa datos ng gubyrno. Ngunit hindi maikakailang mas masahol pa dito ang kalagayan. Anu't-anuman, ang mga burukratang may kontrol sa mga kooperatiba at mga matataas na upisyal ng mga ito ang pangunahing nakikinabang. Sila ang nagiging sanhi ng pagkalugi at pagkakautang ng mga kooperatiba at ipinapasa nila ang mga epekto nito sa mamamayang Bikolanong dati nang lugmok sa kahirapan.

### **10 Puntong Programa ni GMA sa Pagpapababa sa Singil sa Kuryente, 10 Puntong Panloloko**

Ayon kay GMA, isa sa mga prayoridad ng kanyang administrasyon ang pagpapababa sa singil sa kuryente. Ngunit malinaw na ang ipinangangalandakan niyang 10 Puntong Programa sa Pagpapababa sa Singil sa Kuryente ay nasa balangkas pa rin ng EPIRA, na lalong nagpapasahol sa kalagayan ng industriya at nagpapabigat sa pasaning singil sa kuryente ng karaniwang mamamayan.

Bilang pagsunod sa World Trade Organization (WTO), Asian Development Bank (ADB) at iba pang maka-kapitalistang

pormasyon, pinapatupad ni GMA ang imperyalistang "globalisasyon" na aapekto maging sa mga estratehikong industriya tulad ng kuryente. Sa kabuuan, ang programa ay pinagandang paglahad lang ng liberalisasyon at pribatisasyon ng industriya. Sa katunayan, may mga hakbangin nang nasimulan ang NAPOCOR sa pagbebenta ng mga prangkesa nito na maaaring upahan ng mga negosyanteng dayuhan sa loob ng 25 taon.

Sisikapin din daw ng rehimeng pataasin ang pangangailangan sa kuryente upang mapababa ang singil dito. Bibigyan ng 25% bawas sa singil ang malalaking negosyong may konsumong mas malaki sa karaniwan. Karamihan ng mga makakakuha ng ganitong pribelehiyo ay ang malalaking kumpanyang dayuhan o yaong mga pag-aari ng malalaking burgesya kumprador. Sa kabilang banda, aalisin ng EPIRA ang subsidyo sa mga karaniwang konsumer at patuloy na

sisingil ng PPA at iba pang dagdag na singil sa anyo ng *universal charge*.

Kasama din sa programa ang nabanggit na pagrepaso sa mga IPP Contracts, ngunit ligtas sa kaparusahan ang mga matataas na upisyal ng NAPOCOR sa mga nadiskubreng anomalya. Dagdag pa, pinangako ni GMA kay Powell noong Agosto na hindi gagalawin ang mga kontrata sa 5 Amerikanong IPP.

Plano ring baguhin ang istruktura ng mga kooperatiba upang mabawasan ang kabuuang P18 bilyong utang ng 119 kooperatiba sa mga prubinsya na nakakasakop sa 6 milyong konsumer. Pumapatungkol ito sa rekomendasyon ng

**...ISULONG ANG  
TUNAY NA  
PANGMATAGALANG  
SOLUSYON:  
ANG  
PAGTATAGUMPAY NG  
PAMBANSA  
DEMOKRATIKONG  
REBOLUSYON AT  
PAGSASABANSA NG  
INDUSTRIYA NG  
KURYENTE SA  
BALANGKAS NG  
PAMBANSANG  
INDUSTRIYALISASYON.**

**Sundan sa pahina 13**

## Monopolyo-Kapitalistang Korporasyon: NILULUMPO ANG EKONOMYA NG IMPERYALISMONG US



**P**atuloy na sumisingaw ang mga senyales ng nabubulok na yugto ng imperyalismo. Dahil sa krisis sa labis na produksyon, walang pinipiling maniobra ang malalaking monopolyo-kapitalista upang mapiga ang sobrang halaga mula sa mga ordinaryong

mamamayan at mula sa mga manggagawang lumilikha ng mga produkto. Kasabwat nila ang mga imperyalistang estado na siyang nagpapatupad ng sistemang tuwirang kumukunsinti sa mga panggagantso ng mga naglalakihang korporasyon.

Sundan sa pahina 14

### Sinisilya-Elektrika ang Bayan

NEA na pag-isahin na lamang ang mga kooperatiba dito sa Bikol. Kung ipapatupad ito, mahigit dalawang libong manggagawa ang mawawalan ng trabaho.

### Sagot ng Mamamayan, Ibayong Paglaban!

Malinaw na walang maaasahan ang mamamayan kay GMA tungkol sa pagpapababa ng singil sa kuryente. Bagkus, iginagapos niya ang bayan sa silya elektrika upang ibayong makapiga ng tubo ang mga dambuhalang kumpanya sa kuryente at mga kasabwat na burukrata. Walang ibang sagot ang mamamayan kundi ibayong paglaban.

Nagkaroon ng malalaking protesta laban sa PPA noong mga nakaraang buwan. Idineklarang Pambansang Araw ng Protesta Laban sa PPA ang ika-4 ng Hunyo sa pamumuno ng Bayan at People's Organization against Warrantless Electricity Rates (POWER). Nanawagan ang mga progresibong organisasyon para sa *national blackout*, na nilahukan ng 11 prubinsya at syudad, kabilang ang POWER-Bikol. Noong ika-6 naman ng parehong buwan, nakakalap ng 4,500 pirma ang ilang upisyal ng CANORECO at mga progresibong grupo para sa petisyon sa pagbabasura ng PPA.

Kailangang pag-ibayuhin pa ang mga ganitong pagkilos upang mailantad ang mga nakapakong pangako ni GMA tungkol sa pagpapababa ng singil sa kuryente. Ngunit higit sa lahat, kailangang isulong ang tunay na pangmatagalang solusyon: ang pagtatagumpay ng pambansa demokratikong rebolusyon at pagsasabansa ng industriya ng kuryente sa balangkas ng pambansang industriyalisasyon.

S

## Nilulumpo ang Ekonomya ng US

Noong nakaraang taon, bumagsak sa resesyon ang ekonomya ng US dahil sa pagkalugi ng mga kumpanyang lumilikha ng mga haytek na produkto. Mahigit sa 4 trilyong dolyares na pamumuhunan ang naglaho sa pamilihan ng US mula Agosto 2001. Ngayon ay patuloy na nilulumpo ng sunud-sunod na eskandalo ang pamilihan ng sapi (stockmarket) ng US dahil nabulgar ang sari-saring pandaraya ng mga korporasyong Amerikano sa kanilang libro de kwenta (accounting books) upang pagtakpan ang kanilang pagkalugi at pamukhaing kumikita ang kanilang mga kumpanya upang patuloy na bilhin ang kanilang mga sapi.

Isa ang Enron, ika-anim sa pinakamalaking mga korporasyon sa buong mundo noong nakaraang taon, sa mga bumagsak dahil sa mga dambuhalang utang nito na nadispalko ng mga may-ari. Sumunod naman ang Worldcom, isang kumpanyang telekomunikasyon, kung saan natuklasang huwad ang idineklara nitong 3.9 bilyong dolyares na tubo. Natuklasan ding dinadaya ng Xerox, isa pang kumpanya ng mga haytek na produkto, ang mga ulat nitong kita sa loob ng nakalipas na limang taon. Ang kumpanyang Apple na gumagawa ng mga kompyuter, ay nagbebenta naman ng mga sapi bago ipaalam sa publiko na bagsak ang kanilang kita.

Ang mga nabanggit ay ilan lamang sa patuloy na mga nabubunyag na kaso ng panloloko ng mga korporasyong Amerikano. Hindi rin nagpapahuli sa mga eskandalo ang mga korporasyong Europeo. Problemado rin sa pinansya ang mga korporasyon dito tulad ng KPNQwest ng Olandes, ang Babcock Borsig ng Alemanya at ang Vivendi ng Pransya.

**Walang ginagawa ang administrasyon ni Presidente Bush ng US upang solusyonan ang ganitong sitwasyon** dahil ito mismo ang


kumakandili sa mga bigtaym na manggagantsong burukrata-kapitalista. Maging si Bush mismo at ang kanyang bise-presidenteng si Dick Cheney ay kumita sa panloloko sa pinansya ng sektor ng enerhiya.

**Sa bandang huli, ang mga ordinaryong mamamayan sa mga kapitalistang bansa ang totoong napapagsamantalahan.** Sila ang


mga maliliit na mamumuhunang ipinambibili ng mga sapi sa pamilihan ang kanilang kakarampot na naitatabing pera. Sa pagbagsak ng Enron, malamang na saluhin ng guberno ng US ang kumpanya at galing sa buwis ng mamamayang Amerikano ang ibabayad sa mga utang ng Enron. Ang mga manggagawa ang unang tinatanggal

sa pagbagsak ng mga kumpanya. Halos 17,000 manggagawa ng Worldcom ang nawalan ng trabaho. Ang buong telekomunikasyon ng US ay nagtanggag ng 160,000 na manggagawa. Nagpahayag din

Sundan sa pahina 15



# Gawaing Masa: Kamtin ang Higit Pang mga Tagumpay Sa Pagtatayo ng Baseng Masa sa Kabikulan



**U**maani ng tagumpay sa pagsusulong ng armadong pakikibaka sa Kabikulan. Mula 1999 hanggang 2001, nairehistro ang halos 42% pagtaas sa bilang ng baseng masa mula sa nakamit na 21% pagtaas noong 1998. Sustinido ang pagtaas ng bilang ng baseng masa mula noong 1995. Ang pagsulong na ito ay nakakaagapay sa kabuuang pag-unlad at pagsulong ng rebolusyon sa buong bansa.

**Nakamit na ang sapat na lawak at latag** ng mga lakas kumpanyang larangang gerilya sa lahat ng prubinsya sa Bikol. Lumalawak ang mga baryo at bayang nakikilusan ng mga yunit ng BHB at inaabot na ang mga paborableng lugar sa kanayunan, mga panabihan ng kalsada, mga kostal na lugar at marami-raming baryo sa kapatagan.

Umaani rin ng mga tagumpay ang pagsusulong ng rebolusyong agraryo sa mas malawak na saklaw at sumigla ang mga pampulitikang aksyong masa. Pakikibakang agraryo ang susing kilusang masang inilulunsad sa kanayunan. Nalunsaran na ng RA ang mahigit 20,000

Sundan sa pahina 16

## Nilulumpo ang Ekonomya ng US

ang 113 na kumpanyang Amerikano na hindi sila mag-eempleyo ng mga manggagawa sa susunod na 12 buwan. Hindi nakapagtataakang naitala noong Abril ang pinakamataas na tantos ng disempleyo sa US sa loob ng pito at may kalahating taon. Noong nakaraang Hunyo, 5.9 hanggang 6% ang tantos ng mga walang trabaho sa US.

Habang bumabagsak ang halaga ng dolyar, wala nang kumpanya ang mga mamumuhunan at ordinaryong mamimili, malakihan ang pagtanggap sa mga manggagawa at tumataas ang pagkalugi sa kalakalan ng buong ekonomya ng US, bumubwelo naman ang produksyon at kita ng industriya sa kagamitang pandigma. Gera ang binabalingan ngayon ng teroristang administrasyon ni Bush upang paganahin ang palyadong imperyalistang ekonomya nito sa kapinsalaan ng mga mamamayan sa buong daigdig na kanyang dinidigma.

S

## Tumitinding Bigwas ng Karahasan

ektaryang niyugan, palayan, maisan, abakahan at gulayan. Nakamit ang 50 porsiyentong pagpapababa ng upa sa lupa sa partihang 2/3-1/3, 60-40 at 50-50 na pabor sa mga magsasaka sa niyugan; at 90-10 naman sa mga palayan at maisan. Umaabot sa mahigit 10,000 pamilya ang nabiyayaan nito.

Subalit natukoy na ibayong mas malaki pa ang dapat maabot sa gawaing konsolidasyon ng ating baseng masa, partikular sa pag-oorganisa. Sa inabot na latag ng baseng masa, relatibong mas malaki pa ang bilang ng impluwensyadong masa na kailangang ipaloob sa mga saligang organisasyong masa ng magsasaka.

**Mahigpit ang panawagang pokusan ang gawaing konsolidasyon.** Sa hakbang-hakbang na pag-oorganisa, matagal na nagkaroon ng bara sa mahabang panahong pagkapako sa antas ng pagbubuo ng GP at KP. Sa daan-daang baryong ilang dekada nang nakikilusan ng hukbo at may mga istableng Sangay ng Partido sa Lokalidad (SPL), tumagal ng ilang taon sa paulit-ulit na proseso ng tatag-buwag na paraan ng pag-oorganisa ng GPB at KPB.

Nang makapaglunsad ng paglalagom ang mga SPL sa maraming baryo, tumampok ang partikular na mga kalakasan at kahinaan sa kanilang mayamang karanasan sa pagsusulong ng iba't ibang linya ng gawain sa pagmumulat, pag-oorganisa at pagpapakilos. Nahalawan ng mayamang aral ang kanilang pagbabalik-aral sa kasaysayan ng pakikibaka sa kanilang baryo. Ibayong nakapagpataas ng kanilang diwang mapanlaban ang pagbabalik-tanaw sa mga

aktwal na pakikibakang antipyudal na inilunsad ng mga tenante at magsasaka sa mga asyendang nagtatamasa na sa ngayon ng biyaya ng rebolusyong agraryo.

Nakita ang kahalagahan ng pagsisinop at pagsasadokumento ng mga partikular na panlipunang pagsisiyasat sa bawat baryo. Nakatulong ito nang malaki sa mahusay na pag-aangkop at pagpapalano ng mga yunit sa gawaing masa para sa lahatang panig na pagsulong ng buong eryang saklaw.

May panimulang sikad na sa pagtatayo ng mga ganap na samahan ng magsasaka (GSM) sa apat na prubinsya. Habang sa ibang mga prubinsya, inihahanda na rin ang mga rekisitos sa pagbubuo nito. Dagdag na pagpupursige at kapangahasang mag-organisa ang naging susi sa matagumpay na pagbubuo ng mga samahang magsasaka bagamat nagkaroon ng pagkaantala at ilang bara sa implementasyon nito. Napuna rin ang konserbatismo sa panig ng ilang namumunong kadre, na nagpapatagal sa rekisito at proseso sa pagbubuo ng samahan.

Ibayong lakas at labis na galak ang nadama ng daan-daang masang magsasakang lumahok sa pagtatayo ng mga GSM. Hudyat ito ng pagpapanibagong lakas upang higit pang magpursige sa mga kampanyang antipyudal at iba pang kampanyang masa sa pagpapataas ng produksyon upang lalong mapalakas ang baseng masa.

Gayunpaman, kapansin-pansin na minimal pa ang ganitong pag-unlad kumpara sa aktwal na lakas na ating inaabot. Napakalaki ng potensyal ng ilampung libong organisadong magsasaka at higit sa sampung libong aktibistang masa na nasa sonang gerilya. Ang patuloy na paglaki ng



Sundan sa pahina 17



## **Diwang Rebolusyonaryo**

### **Isang araw sa isang baryo sa kanayunan May isang pangyayaring hindi malilimutan...**

#### **BABAE**

Ano itong ating pagpupulungan?  
Ano ang ating pag-uusapan?  
Iniwan ko pa naman  
Isang tambak na lalabhan.

#### **LALAKE**

Hindi ko rin alam kung bakit tayo  
pinatawag  
Ng mga kasamang naglilingkod na tapat  
Hintayin na lang natin ang paliwanag  
Siguradong lilinawin din ang lahat.

#### **KASAMA 1**

Magandang hapon sa ating lahat  
Maganda't andito na tayong lahat  
Upang masimulan nang pag-usapan  
Ang bubuuhing Ganap na Samahan.

#### **BABAE**

Ha? Bakit? Ano yan?  
Ano ang sinasabi mong Ganap na  
Samahan?

#### **KASAMA 2**

Teka Teka Teka aking ipapaliwanag  
Upang masagot ang ating mga  
katanungan

Ang Ganap na Samahan o G-S-Eme  
Ay isang organisasyong mas mataas ang  
antas sa K-P-Eme  
Ito'y itinatayo 'pag ang baryo konsolidado  
Upang sa praktika, masa ang  
maggugubyrno

Ang mga kagawad nito ay inyong iboboto  
Galing sa hanay ng masang organisado  
Babasahin at susuriin ang rekord ng mga  
kandidato  
Upang ang karapat-dapat ang siyang  
uupo.

Walang manloloko walang mandadaya  
Dahil sa eleksyon at bilangan andyan ang  
buong asembliya  
At nasa asembliya rin ang kapangyarihan  
pang patalsikin ang 'di na maaasahan.  
Ang mga nahalal na kagawad, pwera sa  
pangulong mapipili  
Ang siyang hahawak sa mga sub-komite  
Edukasyon, Arbitrasyon, Ekonomya,  
Kalusugan  
Pati Depensa at Pag-oorganisa ang siyang  
hahawakan.

**Sundan sa pahina 18**

### **Gawaing Masa**

baseng masa ay kailangang mai-transporma bilang balon na pagkukunan ng lakas ng  
armadong pakikibaka sa rehiyon.

**Paandarin ang kilusang masa** upang mapalawak at tunay na mapalalim ang baseng  
masa. Ang pinakamataas na sukatan ng tagumpay sa pag-oorganisa sa masa ay ang  
pagsasalin ng lakas ng organisasyon sa aktwal na pagkilos ng masa at pagsusulong ng  
kanilang kilusan at mga pakikibaka. At upang mabisang mapakilos ang mamamayan,  
kailangang pagtuunan ang mga pagsasanay sa iba't ibang linya ng gawain. Kaalinsabay ng  
gawaing pagpapalawak at konsolidasyon, kailangang pasiglahin ang pagsusulong ng gawaing  
pangkultura upang mapataas at mahubog ang militante at proletaryong diwang mapanlaban  
ng malawak na masa ng sambayanan.

**S**

## Diwang Rebolusyonaryo

Ang mga grupong pang-organisa  
Magiging grupong balangay na.  
May kanya-kanyang gawain ngunit  
magkaka-ugnay  
Ito ang hatian at tulungan sa trabaho  
Upang sistema'y mas maunlad, mas  
mahusay.  
Tunguhin ay sistema ng siyentipikong  
sosyalismo.

Maglulunsad ng mga kampanya sa bawat  
usapin  
Malakihan malawakan at mga taon ang  
sasaklawin  
Responsibilidad ng mga sub-komite ang  
pagpapalano  
Ang implementasyon ay sa pagkakaisa  
ninyo.

### LALAKE

Maganda ang naisip ninyong plano mga  
kasama  
Ngunit sa tingin n'yo ba kami'y handa na?  
Ano ang gagawin? Paano sisimulan?  
Sabihin n'yo sa amin ang pamamaraan.

### KASAMA 1

Wag mag-alala kayo'y aming gigiyahan.  
Unang hakbang bumuo ng mga task force  
Tutulungan kayo sa inyong pagkilos.  
Lalagumin ang kasaysayan  
Ng buong organisasyong masa sa baryo  
Upang sa mga aral tayo'y matuto.

Kailangan ding maglunsad ng kampanya  
sa edukasyon  
Upang ihabol inyong pampulitikang  
kamulatan.  
Dahil malaking responsibilidad ang inyong  
hahawakan  
Kailangang maging handa sa paghawak ng  
kapangyarihan.

Ito ang magiging sandata sa pagpigil at  
pagsawata

Kung sumulpot ang ekonomismo,  
komandismo, konserbatismo  
At iba pang sakit na tutungo sa pagiging  
reaksyunaryo.  
Upang mapangalagaan itong dakilang  
adhika.  
Maliban pa, ang ating istruktura  
Ay hindi katulad sa bulok na gubyrno.  
Ang kapangyarihan ay magmumula sa  
asembliya  
Pababa sa kumperensya tungo sa komite  
at mga sub-kom nito  
Hanggang mga grupong balangay, at sa  
asembliya na naman  
Kung saan ang simula at dulo ng  
kapangyarihan.

### BABAE

Isang karangalan kung gayun ang ating  
haharapin  
Mabigat ding responsibilidad kung iisipin  
Ngunit alam nating ito'y napapanahon.  
Panahon na upang ating isulong sa mas  
mataas na antas  
Ang rebolusyonaryong organisasyong  
masa  
Tungo sa organo ng kapangyarihang  
pampulitika.

### LALAKE

Mga kasama, isipin pa natin ang iba  
Na kakailanganin bago ang pangkabuuang  
asembliya  
Lohistika, seguridad pati pang-ekonomya.  
Pwede pa nating magamit ang luma kong  
lona\*  
Kahit may butas na yun,  
Pwede pang magsilbi sa rebolusyon!

### MGA KASAMA

Halina't isulong halina't ikampanya!  
Ang pagbubuo ng Ganap na Samahang  
Masa!

*\*Lona — isang materyal na ginagamit  
bilang tent at pambubong sa payag.*

S

# Ang Buhay at Pakikibaka ni Ka Boy: Ang Muog



**M**ay bantayog na ibinabaon sa puso't diwa ng masa. May dambanang muli't-muling ipinupundar, pinatatayog ng mga kasama. Muog na siyang ititindig at imumuhon sa harap ng tarangkahan ng kaaway, at siya ring dadagok at dudurog sa kanila.

Ang muog na ito ay si Ka Boy, hinubog at pinatatag ng rebolusyon. Mula sa mataas na saray ng petiburgesya, tinibag niya ang kanyang uri at piniling tahakin ang landas ng proletaryado. Sa rebolusyon unti-unting dinurog ni Ka Boy ang pinagmulang uri at hinubog ang sarili bilang tagapaglingkod ng sambayanan.

Nagsimulang kumilos si Ka Boy sa Bikol matapos ideklara ang Batas Militar. Buo ang kaloobang sumanib siya sa sambayanan sa paglaban sa Imperyalismo, Burukrata Kapitalismo, at Pyudalismo. Walang-pag-aatubili siyang tumalima upang gumampan ng mahahalagang gawaing magpupundar ng rebolusyon sa Bikol. Una siyang itinalaga sa Liaison Staff at nang lumao'y naging kagawad ng Komiteng AdHoc sa Urban. Nakilala ng masa at hukbo ang mapagpakumbabang kasama bilang Ka Angel at Ka Mumar.

Bawat tipak ng kaniyang muog ay hinulma ng puspulang pag-aaral at pagkilos. Sinamantala ni Ka Boy ang bawat pagkakataon upang matuto at magpalalim ng mga bago at wastong kaalaman, at walang-sawa ring ipinapasa niya ito sa mga kasama.

Sa pagpapabilis at pagpapadulas ng mga rebolusyonaryong gawain, laging handang matuto at buong kasiglahan siyang umaangkop at kinakabisa ang mga bagong kagamitan at teknolohiya, halimbawa na ang kompyuter, upang pagsilbihin ang mga ito sa rebolusyon. At hindi nagtatapos sa sarili ang kaalaman. Buong-alab din siyang tumututok sa mga kasama upang ibahagi ang kanyang natutunan. Wala siyang sinayang na panahon sa pag-aaral at pagpapalaganap ng napag-aralan.

Tagos sa kanya ang kahalagahan ng ibang larangan ng gawain sa pag-aarmas ng sambayanan, kaya't maging sa pagtula, pagsulat ng iskrip, at paglikha ng kanta ay taglay niya ang pagmamahal sa bayan at pagpupunyagi sa komunistang kaisipan.

Walang pag-iimbot sa sarili, buong-tatag niyang hinarap ang mga sakripisyo at kahirapan na kaakibat ng pagrerebolusyon. Mula sa pagpapahalaga sa mga gamit, hanggang sa pagpapakatatag sa loob ng bilangguan, halimbawa si Ka Boy ng pag-aalay ng sarili. Hindi maselan at walang pagpipili, hangga't maaari ay pinakikinabangan niya ang mga gamit. Hindi rin naging hadlang sa kanyang pagkilos ang kahinaan sa paningin gayundin sa pagkabisa ng lugar. Hangga't sa magagawa niya pa ay hindi siya magpapatulong, bagkus ay buong pagsisikap siyang magpapatuloy.

Sundan sa pahina 20

## **Diwang Rebolusyonaryo**

Maharap man sa mga tunggalian, nagsisikap si Ka Boy na maipaliwanag ang kanyang panig, at tumutupad pa rin kahit ang lumitaw na panig ay di kanya. Bihira siyang magalit, at kung magalit man, kakikitaan lamang siya ng pamumula, pagkabalisa at bilis ng pananalita.

Sa pagharap ng panlalamig ng ibang kasama dahil sa sunud-sunod na depensibang labanan, namalagi pa rin si Ka Boy sa rebolusyon. Minahal ng masa at hukbo ang kasamang nagrekober sa mga baryong naiwan at sumalo sa mga kasamang nanlamig.

Nang mabilanggo siya, sinikap niya pa ring magampanan ang mga gawain sa kabila ng mga limitasyon. Patuloy siyang umugnay sa mga kasama, at nag-organisa sa loob ng kulungan – wagas na pag-aalay ng sarili para sa rebolusyon!

Nakabaon na sa kalooban ng mga kasama ang muog ni Ka Boy. Imahe siya ng pag-uugat sa masa at kasama. Sa kabila ng kaniyang mahahalagang responsibilidad ay may panahon siya upang manatiling nakalubog sa mga kasama. Umaapaw ang diwa ng mga kasama sa mga kwento ng kani-kanilang karanasan kapiling si Ka Boy. Bagamat ang ibang kwento'y naghahatid ng katatawanan, bawat alaala'y puno ng pagmamahal at pagdakila sa kasama.

Madaling lapitan at malapitin si Ka Boy, ang kasamang laging nakasumbrero, ang kasamang mababa lang at nakasalaman, ang kasamang malumanay magsalita. Kilala siya bilang kasamang nakakaalam ng partikular na interes ng iba pang kasama. Alaala si Ka Boy ng ikinokonsultang mga personal na problema, ng pagtutok sa kasama sa pagtuturo ng kompyuter, ng pagbabalita tungkol sa pagkapanalo ng kanyang paboritong tim sa basketbol, ng ipinapadalang mga mumunting balita at litratong ginupit sa dyaryo, ng pakikipagsayaw sa kasama nang makarinig ng tugtog habang nasa lakaran, at marami

pang ibang paggunita sa banayad niyang muog.


Maging sa pagpapamilya ay mapag-alala pa rin si Ka Boy, maasikaso pa rin sa kabila ng kanyang mga gawain, laging inaalam ang kalagayan ng pamilya, at mapag-alala – minsa'y nagbalot ng matamis na bao para sa asawa, at nagpadala ng prutas kahit nabulok na ito nang makarating. Katulong niya ang mga kasamang nagmamahal sa kanya sa pagharap sa mga hamon ng pagpapamilya.

Hindi pinagsasawaan ng masa at kasama si Ka Boy. Inialay niya ang kanyang sarili para sa kanila. At malugod siyang tinanggap ang minahal ng sambayanan.

Umaga ng Hunyo 7, taong 2000. Tinangkang tungkabin ng mga pasista ang muog ni Ka Boy. Kinubkob ang base ng mga kasama at isa siya sa mga namatay. Ibinuwal nila si Ka Boy, ngunit ang kanyang bantayog ay malaon nang nakapag-muhon sa kaloob-looban ng puso't diwa ng masa at hukbo. Pagkalalim-lalim ng kanyang pagkakaugat, na ang pangalan niya'y nagpapasikdo sa dugo ng masa at kasama, at nagluluwal ng mas kabog-dibdib, mas talas-diwang pagrerebolusyon – ibayong pagkilos na pupuno sa puwang ng pagkakabuwal ni Ka Boy.

Ito ang magpapaguho sa kuta ng mga mapagsamantala't mapang-api – ang pinaigting na pagkilos na kabiya ng pag-alala. Sa unti-unting pagtibag sa pader na pinaglulukuban ng kaaway, dagdag na armas nating mga nagpapatuloy sa rebolusyon ang mga aral sa buhay at pakikibaka ng mga kasamang nagbuwis ng sarili. Ang alaala ng mga rebolusyonaryong martir ay lamat na magiging bitak at magpapabagsak sa balwarte ng kaaway. Dudurugin ang kanilang lungga ng alaala ni Arsenio Gil Lacsamana, ng ni-minsa'y hindi-natinag na muog ni Ka Boy, isang ganap na rebolusyonaryo.

**S**

**REYD SA ISLA NG CATANDUANES, TAGUMPAY!**

**BAGAMANOC** - Matagumpay na ni-reyd ng mga Pulang Mandirigma ang munisipyo at baraks ng PNP ng Bagamanoc sa isla ng Catanduanes noong Hulyo 12, 2002. Nasamsam sa nasabing reyd ang apat na M16 armalayt, dalawang M14, isang shotgun, dalawang cal .45, isang 9 mm, isang cal .38, mga bala, iba't ibang klase ng granada at iba pang gamit militar.

Napatay sina SPO1 Roberto Enaga at PO1 Patrick Pante ng magtangka itong lumaban. Samantalang dalawa pa sa reaksyunaryong PNP ang nasugatan.

Alas 12:30 ng tanghali, sakay ng dalawang trak, dumating ang isang malaking platun ng mga NPA sa bayan ng Bagamanoc. Pagbaba sa trak ay dumiretso ang isang iskwad ng mga mandirigma sa munisipyo. Dahil sa mahusay na maniobra at inisyatiba ng mga mandirigma, madaling napasok ang gusali at nakontrol ito sa loob lamang ng ilang segundo. Samantalang dumiretso naman ang isa pang iskwad sa baraks ng PNP. Bahag ang buntot na nagsitakas ang ilan sa mga pulis matapos paputukan ang mga ito. Wala pang dalawang minuto ay nakontrol na ng mga mandirigma ang nasabing baraks. May pulis namang nagtangkang bumira sa likod ng pormasyon ng mga mandirigma subalit binigo ito ng mga nakatalagang isnayper.


Sundan sa pahina 22

**ABUSADONG MGA CAFGU, PINARUSAHAN!**

**ALBAY** - Ginawaran ng parusang kamatayan ang abusadong CAFGU at kapitan ng barangay na si Emerito Capital ng brgy Mahaba, Ligao City noong Hulyo 11.

Siya ay aktibong CAFGU mula pa noong 1986. Noong panahon ng kasagsagan ng mga Low Intensity Conflict-Special Operations Teams (LIC-SOT) ng militar, marami siyang naging krimen sa mamamayan.

Napatunayan ng hukumang bayan na direktang sangkot si Capital sa pag-salbeyds sa isang sibilyang aktibong kasapi ng Komiteng Pang-organisa ng Magsasaka. Nanguna siya sa pagpapahamak ng mga sibilyan na diumano'y mga poste at susi ng NPA. Masugid din siyang giya sa mga operasyong militar.



**SORSOGON** - Pinarusahan ng demokratikong hukumang bayan ang isa pang abusadong Cafgu na si Aurellano Lazarte ng barangay Marinab, Bulan, Sorsogon noong Hulyo 14.

Si Lazarte ay aktibong miyembro ng CAFGU at masugid na giya sa mga operasyong militar. Bahagi siya ng Barangay Intelligence Network (BIN). Imbwelto din siya sa pagpapadampot sa mga sibilyang diumano'y may kuneksyon sa rebolusyonaryong kilusan.

At bilang miyembro ng CHDF noong panahon ng batas militar, imbwelto rin siya sa pangmamasaker sa mga sibilyan sa kanilang lugar.

**S****Reyd sa Isla ng Catanduanes**

Itinaon ng mga NPA na oras ng pananghalian ang pag-atake sa munisipyo upang makaiwas sa bulto ng sibilyan sa nasabing lugar. Nang masumpungan nila ang isang sibilyan sa loob ng munisipyo ay agad nila itong pinaliwanagan at tiniyak na hindi madadamay sa putukan. Bilang bahagi pa rin ng pagsasaalang-alang ng kaligtasan ng mga sibilyan, ilang oras pa bago maganap ang reyd ay nagtalaga na ang mga mandirigma ng harang sa kalsada papasok sa lugar na paglulunsaran ng reyd. Sa pagharang at pagbantay ng mga mandirigma sa kalsada, nagpakilala at nagpaliwanag ang mga ito sa mga sibilyang naroon tungkol sa nagaganap sa sentro. Nasumpungan nila sa isang dyip ang dalawang PNP na agad namang kumaripas ng takbo. Dahil wala nang kakayahang lumaban ang mga pulis, hindi na ito hinabol o pinaputukan ng mga mandirigma. Nasamsam ang mga baril at balang naiwan nito.

Sa pag-atras, naglakad lamang ang mga mandirigma palabas ng sentro at namigay ng pahayag at mga babasahin sa mamamayan. Tuwang-tuwa naman ang mga Catandunganong sumalubong at nakipagkamay sa mga mandirigma. Niyanig ang buong isla ng Catanduanes sa kauna-unahang reyd dito.

**S**

**INTEL NG ISAFP, INISPARO**

**SORSOGON CITY** - Iginawad ng demokratikong hukumang bayan ang parusang kamatayan sa ahente ng Intelligence Service of the Armed Forces of the Philippines (ISAFP) na si Gerry Espinas sa pamamagitan ng operasyong isparo sa Sorsogon City noong Agosto 31.

Si Espinas ay may mahabang rekord ng krimen sa rebolusyonaryong kilusan at mamamayan simula pa noong maagang bahagi ng dekada 70.

Napatunayan sa hukumang bayan ang kanyang sukdulang pagtataksil sa kilusan matapos siyang lihim na magsurender noong 1977.

Dati siyang miyembro ng Komiteng Adhoc ng CPP-NPA-Bikol noong dekada 70. Dati siyang kumilos sa probinsya ng Sorsogon. Kanyang ibinulgar sa kaaway ang maseselang impormasyon hinggil sa organisasyon ng PKP na puminsala nang malaki sa kilusan.

Bilang aktibong miyembro ng ISAFP, pangunahin siyang itinalaga sa rehiyon IV at V upang iproyekto ang mga susing kadre at lider ng CPP-NPA-NDF.

Direkta siyang sangkot sa pagpahuli at pagpatay sa ilang mga namumunong kadre ng Partido sa rehiyon at sa gawaing urban. Isa sa mga kinasangkutan niya ay ang kaso ng pagpaslang kay Melito Glor.

Naghasik siya ng pang-iintriga at paninira sa prestihiyo ng Partido sa rehiyon sa layuning magkaroon ng malawakang pagpasurender sa mga kumander at mandirigma ng NPA.

Aktibo siyang nakipagtulungan sa kaaway upang maibagsak ang baseng masa at rebolusyonaryong kilusan sa Sorsogon. Napakaraming sibilyan ang kanyang ipinahamak at direkta siyang sangkot sa maraming kaso ng pamamaslang, pagtortur at pananakot sa mamamayang sumusuporta sa kilusan. Resulta nito, maraming saligang organisasyong masa ang nabuwag.

Alinsunod sa batas at hustisya ng demokratikong gubyernong bayan, iginawad ang pamamarusa sa isang rebisyunistang taksil na may mabibigat na kriminal na pananagutan sa rebolusyonaryong kilusan at sa mamamayan.

**S**

---

**DETATSMENT NG ARMY, HINARAS!**

**LEGASPI CITY** - Hinaras ng pitong pulang mandirigma ang detatsment ng Charlie Company ng 22<sup>nd</sup> Infantry Battalion ng Philippine Army sa Brgy. Humapon, Legaspi City nitong Hulyo 9, 2002 bandang alas 9:00 ng gabi. Napatay sa aksyong militar na ito ang dalawang pasistang militar.

Brown-out sa nasabing lugar ng magmaniobra ang mga mandirigma papalapit sa detatsment. Nasa pusisyon na ang mga ito nang magkailaw samantalang naghihiyawan naman ang mga lasing na CAFGU at militar habang nakikipag-inuman.

Dahil taglay ng mga mandirigma ang mahusay na manerang kumando at ang elemento ng sorpresa, nabulabog at nataranta ang mga pasistang militar nang paputukan na ang mga ito. Bahag ang buntot na nagtakbuhan at nagsipagtago ang mga ito. Tumagal ng 30 minuto ang nasabing panghaharas ng mga NPA.

Ligtas na nakalayo ang mga pulang mandirigma. Malayo na sila nang makapagpaputok ang mga CAFGU at militar sa detatsment.

**S**



**ISANG BUS NG SAINT JUDE BUS  
LINER, SINUNOG!**

**ALBAY** - Pinarusahan ng Santos Binamera Command ng NPA-Albay ang Saint Jude Bus Liner na pag-aari ni Socorro Buban ng Tabaco, Albay. Sinunog ng mga pulang mandirigma ang isang bus ng nasabing kumpanya nitong Hulyo 25, 2002 bandang alas 6:45 ng gabi sa Brgy. Bariw, Camalig, Albay.

Iginawad ang parusang ito sa nasabing kumpanya dahil sa hindi nito pagkilala sa mga patakaran sa pagbubuwis ng demokratikong gubyernong bayan.

Limang mandirigma ang sumakay sa bus ng Saint Jude na biyaheng Pasay mula sa terminal sa Legazpi City. Paglagpas sa sentrong bayan ng Camalig ay nagpakilala itong mga NPA sa drayber at mga pasahero. Nagulat subalit hindi natakot ang mga pasahero ng bus. May mga pasaherong nakapagsambit, "Ah mga kasama pala, 'wag tayong matakot at mababait ang mga 'yan. Hindi tayo maaano."

Nagpaliwanag ang mga mandirigma sa drayber at mga pasahero tungkol sa rebolusyonaryong pagbubuwis na ipinatutupad ng Demokratikong Gubyernong Bayan. Nagpropaganda din sila tungkol sa isinusulong na demokratikong rebolusyong bayan, sa lumalakas at lumalawak na rebolusyonaryong kilusan, at sa inilulunsad na digmang agresyon ng US.

Matapos ang ilang minutong pagpapaliwanag ay pinahinto ang nasabing bus sa kalsada papasok sa barangay Bariw. Katulong ang mga mandirigma, ibinaba ng mga pasahero ang lahat nilang gamit mula sa bus. Nang matiyak na wala nang laman ang bus, maliban sa mga pag-aari ng kumpanya nito, ay binuhusan na ito ng gasolina at pinasabog.

Ligtas na nakaatras ang mga mandirigma matapos ang pamamarusang ito.

**S**